

開放文學 – 歷代筆記 – 夷堅丁志 卷第四

孫五哥 鄭人孫愈·王氏甥也·年十八九歲時·到外家·與舅女真真者·憑闌相視·有嘉耦之約·歸而念之·會有來議婚對者·母扣其意·雲如真真足矣·母愛之甚·亟為訪於兄·兄言吾數婿皆官人·而甥獨未仕·若能取鄉薦·當嫁以女·愈本好讀書·由此益自勤苦·凡再試姑蘇·輒不利·女亦長大·勢不可復留·乃許嫁少保趙密之子·愈省兄懇於臨安·因赴飲舅氏·真真乘隙垂淚謂曰·身已屬他人·與子事不諧矣·愈不復留·即還崑山故居·遇姪革於道·邀同舟·問之曰·世俗所言相思病·有之否·我比日厭厭不聊賴·腸皆掣痛如寸截·必以此死·革宛轉慰解·且諷之曰·叔少年有慈親·而無端戀著如此·豈不為姻黨所笑·既至家·館革於外舍·愈宿母榻·半夜走出·呼革起·曰·恰寢未熟·聞人呼五哥·愈第五·視之·則真真也·急下床·茫無所睹·此何祥哉·革留旬日過臨安·適真真成禮於趙氏·次日合宴·恍然見人立其旁·驚曰·五哥何以在此·便得疾·逾月乃瘳·是時愈已病·羸瘠骨立·與母謁醫蘇城·及門為母言·此病最忌噓逆及嘔血·若證候一見·定不可活·語畢·忽作惡·吐鮮血數塊而死·方女有所見之夕·愈尚無恙·豈非魂魄已逝乎·後生妄想·不識好惡·此為尤甚·故書以戒雲·女今猶存·

司命府丞

王筌·字子真·鳳翔陽平人·其父登科·兄弟皆為進士·筌獨閒居樂道·一日郊行·憩瓜圃間·野婦從乞瓜·乳齊於腹·筌知非常人·問其姓·曰·吾蕭三娘也·筌取瓜置諸囊以遺之·婦就食·輟其餘·曰·爾可嘗乎·筌接取而食·無難色·婦曰·可教矣·神仙海蟾子·今居此·當度後學·吾明日挾汝往見·及見海蟾子·汝以夙契得遇我·命長跪傳至道·授丹訣·戒以積功累行·遂還家白母·遣妻歸·週遊名山·一時大臣薦其賢·賜封衝熙處士·元符三年·再游茅山·先是中峰石洞忽開·真誥所謂華陽洞天便門者也·一閉千歲矣·又甘露下降·道士劉混康曰·必有異·既而筌乃來受上清篆·是夕仙樂聞於空浮之上·留逾歲·晝夢二天人與黃衣從者數百乘·擁白虎來迎·跨虎而行·登危躡險·由中峰入石洞·向所開便門·顧視左右·金庭玉室·兩青衣童入通·見茅君再拜謁·君問勞甚厚·曰·帝已飭汝華陽洞天司命府丞·因賜金尺以還·及寤·別混康曰·吾數將盡·且有所授·從此逝矣·下投道人葛衝曰·敢以死累公·預言八月十七日當解化·及期·具衣冠端坐而卒·時建中靖國歲·春秋財六十一·

劉士彥

劉士彥·自睦州通判替歸京師·櫂舟宿泗間·遇乞人·年可十七八·目瑩唇朱·光彩可鑒·異而問之·對曰·吾賣豆每粒千二百錢·劉曰·吾適乏錢·只有所衣綿襖以奉償如何·曰·固可也·容取豆·以紙一幅於兩乳間擦之·輒有黑豆數粒出·取一與劉·擲其餘泔水中·劉欲吞之·曰·未也·又探胸掖間·復有菜豆數粒出·亦取一與劉而擲其餘·劉併吞二豆畢·與所許衣·笑而不取·劉始病蠱·不能食·即日食如初而益多·後面色如丹·但每歲一發·渴必飲水數鬥·覺二豆在腹中如棗大·乞人又約某年相見於淮西·不知如何也·右二事見浮休集·

蔣濟馬

幹道七年秋·大饑·江西湖南尤甚·民多餓死·八年春·邵州遣吏蔣濟·往衡山嶽市·買樸硝等物·造甲乘馬以行·緣道踐人麥田·或以米飼馬·二月二十七日·至衡山境內櫟岡·忽天色鬥暗·不辨人物·雷聲大震·良久開晴·濟與馬皆仆地死矣·邵州以事申轉運司·轉運判官陳從古·揭榜一路以示戒·

皂衣髻婦

婺源士人汪生·幹道六年春·過常州宜興·為周參政館客·季冬之夕·有婦人自外來·通身皆皂衣·頂為兩髻·貌絕美·手捧漆杵·杵中盛果饌·別用一銀杆貯酒·徐步至前曰·夫人以天寒夜長·念先生孤坐·令妾進酒·汪且喜且疑·謂夫人不應深夜遣美妾獨出·豈非宅內好事者欲試我歟·然服飾太古·似非時世裝·二者皆可疑·不敢舉首·亦不飲·婦人曰·此酒正為先生設·何所嫌·言之再三·汪遂飲猶未半·婦人自取果恣食·又謔浪嬉笑·通綢繆之意·汪始惶恐·放酒走出·良久復入焉·一無所見·明夜·其來如初至於三·汪不得已·悉所見白周公·公曰·家間尋銀杆無處所·方以責婢僕·得非怪邪·命遍索幽隱·至酒室·見古鐮甚樸·木牛杆皆在內·周曰·必此物也·舉其腹視之·乃唐乾封年造·即碎之·自此無所睹·汪說·

沅州秀才

沅州某邑村寺中·僧行者十數輩·寺側某秀才善妖術·能制其命·凡僧出入·必往告·得貝親施必中分·不然·且受禍·雖雞犬亦不可容·紹興三十年·客僧旦過·方解包·會鄰村有死者·急喚僧誦經入殮·時寺眾盡出·唯此客獨往·得錢七百以還·既而眾歸知是事·相顧嗟愕·至暮悉捨去·客固不悟也·饑甚·入廚取食畢·自閉三門·升佛殿坐佛腳下·以袈裟蒙頭·誦楞嚴咒·夜過半·迅雷一聲起·霹靂繼之·而窗櫺間月色如畫·俄聞鈴鐸音·若數壯夫負巨木·欲上復下·如是三四反·又若失腳而墮·遂悄無所聞·天明出視·得四紙人於階下·旁一棺亦紙為之·漫折於懷中·少頃眾至·見之驚·爭問夜所睹·具以本末告之·且云·彼人習邪法·既不能害人·當自被其害·試共往扣·則秀才果已斃·四體如刀裂·寺以告縣·遣巡檢索忠者體究其事雲·王充老說·

德清樹妖

宋安國·為浙西都監·駐湖州·其行天心法猶不廢·德清民家為祟擾·邀宋至其居·治不效·更為鬼挫辱·宋忿怒·詣近村道觀·齋戒七日·書符誦咒·極其精專·乃仗劍被發·入民居後大樹下·禹步旋繞·忽震雷從空起·樹高數丈·大十圍·從頂至根析為兩·又震數聲·枝幹無巨細·皆劈裂如算籌·堆積蔽地·怪遂掃跡·

郭簽判女

湖州德清縣寶覺寺·頃有郭簽判·敢女極於僧房·出與人相接·大為妖害·後既徙葬·而物怪如初·寺中扁此屋三間·不敢居·久之·侍衛步軍遣將卒來近郊牧馬·宗室子趙大·詣寺假屋沽酒·僧雲·無閒舍·獨彼三間·以鬼故·不為人所欲·然非所以處君也·趙曰得之足矣·吾自有以待之·即日啟門·通三室為一·正中設榻·枕劍而臥·夜漏方上·女已颯然出·豔妝鮮服立於前·趙曰·汝何人·何為至此·笑而不言·問之再三·皆不對·趙遽起抱之·頗窘畏·為欲去之狀·俄頃間如煙霧而散·懷中了無物·自是帖然·趙居之十餘年·不復有所睹·

鎮江酒庫

歐陽嘗世為鎮江總領所酒官·以酒庫摧陋·買民屋數區·即其處撤而新之·時長沙王先生赴召·過鎮江·其人精治案魘魅·不假符水咒法·蓋自能默睹·歐陽遇之於府舍·即往謁·邀至新居·具食以待·扣之曰·此地有鬼物乎·曰·有二鬼·一以焚死·一以縊死·然皆畏君不敢出·但一大蛇枉死·不知其故·當令君見其形·左右聞者毛悚·飯罷·王語主人·可視壁間·視之·蛇影大如椽·長表丈·自東而西·乃具詢主吏·對曰·一酒匠因烝酒墮火中·一庫典以盜官錢自盡·而不能記蛇事雲·右三事皆歐陽傷說·此其父也·

胡教授母

處州胡教授母·年九十而終前兩日·何人來與語·使之告世人云·大鼓不鳴·深水不流·六月降霜·蘆沉石浮·間隔寒泉·高山一丘·且言冥司處處令人報世間·公直為上·勿攘田土錢物·見專治此等事·更有數語·傳者以為不可載·時幹道八年·何德楊說·

戴世榮

武翼郎戴世榮·建昌新城富室也·所居甚壯麗·紹興三十二年·家忽生變怪·每啟房門·常見杯杓肴饌·羅列地上·群犬拱立於傍·篋中時時火作·燒衣物過半而篋不壞·妻趙氏在寢·覺床側如人擊破瓦缶數枚者·一室振動·塵霧滃然·尋即臥病·或擲磚石器物·從空而下·門闔窗柱·敲擊不暫停·其音亦錚錚可愛·驗擊處皆如繭栗痕·歷歷可數·醫者黃通理·持藥至·奪而覆之·倉黃卻走·飛石搏其腦·立死·巫者湯法先·跳躍作法·為二圓石中其踝·匍匐而出·僧志通·持穢跡咒·結壇作禮未竟·遭濕沙數鬥·壅其頭項·幾至不免·親戚來問疾者·慮有所傷敗·皆面壁而行·百種禳禱無少效·趙氏以所受張天師法篆·鋪帳頂·裂而擲之地·竟不起·世榮足患小疽·遭怪尤甚·乃取魚網離地數尺·遍布室中·以避投石之害·猶擲於網之下不已·相近三二十里人家·碗碟陶器·無一存者·皆不知所以失·蓋其日夜所擊之物也·世榮疾篤·見異物立廷下·馬首赤髟鼠·長丈餘·須臾首漸低·大吼一聲·擊空而去·不數日·疽潰而死·家遂衰替·世榮雖富室子·然鄉里稱善人·殊不測所以致怪也·趙氏兄善宰說·京西田中蛇

河中府老兵胡德·壯年往京西捕盜·晝過村野·遇大蛇於麥壠中·昂首疾行·麥為之靡·數卒挾槍刺殺之·其長丈許·分為十餘瓣·各挈提以去·德取其頭掛於槍·行未遠·村婦人望見·博膺迎哭曰·誰令兒輕出以速死·率家人共挽德·至所居哀訴·且買蛇頭瘞之·又一客以端午日入農家乞漿·值其盡出刈麥·方小立·聞屋側喀喀作聲·趨而視·則有蛇踞屋上·垂頭簷間·滴血於盆中·客知必毒人者·默自念吾當為人除害·乃悉取血置其家齏甕內·詣鄰邸以須·良久彼家長幼負麥歸·皆渴困·爭赴廚飲齏汁·客飯畢·復過其門·則舉室死矣·外舅為河中教授日·胡德為闖者·說此事·

建昌井中魚

大觀戊子年七月五日·建昌軍驛前大井·水連日腥不可飲·居民濬治之·得一魚可三指大·類鯽而眼上赤紋色如金·頭有兩角·細而堅硬·民貯以巨桶·並買楮鏹送於江·至暮大風急雨·吹折大木無數·皆疑以為龍類雲·

王立火 鹿鴨